



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

04.07.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ ՍՑ-ԱՄ-2017/23

Հայաստանի Հանրապետության գնումների բողոքարկման խորհուրդը (այսուհետ նաև՝ Խորհուրդ) ուսումնասիրելով Հայաստանի Հանրապետության ֆինանսների նախարարության 16.06.2017թ. թիվ 03/27-1/10923-17 գրությամբ «Նոյավան» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգով ներկայացված հիմքերը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը

ՀՀ ֆինանսների նախարարությունը, ՀՀ պաշտպանության նախարարության 06.06.2017թ. թիվ ԴՎԱ/1689 գրության հիման վրա, 16.06.2017թ. թիվ 03/27-1/10923-17 գրությամբ ՀՀ գնումների բողոքարկման խորհրդում նախաձեռնել է «Նոյավան» ՍՊԸ-ին (այսուհետ նաև՝ Ընկերություն) գնումների գործընթացին մասնակցելու իրավունք չունեցող

մասնակիցների ցուցակում (այսուհետ նաև՝ Ցուցակ) ներառելու պաշտոնական ընթացակարգ:

2. «Նոյավան» ՍՊԸ-ի ներկայացրած փաստաթղթերը և դիրքորոշումը.

«Նոյավան» ՍՊԸ-ն 23.06.2017թ. գրությամբ հայտնել է, որ շինանյութի ձեռքբերման նպատակով կազմակերպված «ԳԱԿ-ՇՀԱՊՁԲ-15/7-ՀՀ ՊՆ ՆՏԱԴ-ՇՀԱՊՁԲ-4/10» ծածկագրով շրջանակային համաձայնագրերի միջոցով գնում կատարելու ընթացակարգի երկրորդ փուլով նախատեսված որակավորման փաստաթղթերը պահանջելու վերաբերյալ նամակը ավտոմատ կերպով հայտնվել է «Նոյավան» ՍՊԸ-ի էլեկտրոնային փոստի (noyavanllc@mail.ru) «սպամ» նամակների շարքում, ուստի Ընկերությունը չի տեսել այդ նամակը, այդ իսկ պատճառով էլ սահմանված ժամկետում չի ներկայացրել երկրորդ փուլով նախատեսված որակավորման փաստաթղթերը: Ընկերությունը տեղեկացվել է այդ նամակի մասին միայն այն ժամանակ, երբ Armeps համակարգից ոչ ավտոմատ ծանուցմամբ ստացվել է գրություն այն մասին, որ Ընկերության հայտը մերժվել է որակավորման չափանիշները հիմնավորող փաստաթղթերը սահմանված ժամկետում չներկայացնելու հետևանքով, ինչից հետո Ընկերությունը կապ է հաստատել ընթացակարգի գնումների համակարգող պարոն Ամիրյանի հետ՝ խնդրելով պարզաբանել իրավիճակը: Պարոն Ամիրյանը հայտնել է, որ իր կողմից համապատասխան ծանուցումը ուղարկվել է Armeps համակարգի ոչ ավտոմատ ծանուցման միջոցով, ինչից հետո Ընկերության մոտ կասկածներ են առաջացել, որ ծանուցումը կարող է հայտնված լինել «սպամ» նամակների մեջ:

Ընկերությունը, պատշաճ ծանուցված լինելով Խորհրդի 23.06.2017թ. ժամը 10:45-ի նիստի վերաբերյալ, ապահովել է իր ներկայացուցիչների մասնակցությունը, ովքեր պնդել են վերը նշված գրությամբ ներկայացված դիրքորոշումը:

3. Հայաստանի Հանրապետության պաշտպանության նախարարության կողմից ներկայացված փաստարկները և դիրքորոշումը.

ՀՀ պաշտպանության նախարարությունը (այսուհետ նաև՝ Պատվիրատու) 06.06.2017թ. թիվ ԴՎԱ/1689 գրությամբ հայտնել է, որ «ԳԱԿ-ՇՀԱՊՁԲ-15/7-ՀՀ ՊՆ ՆՏԱԴ-ՇՀԱՊՁԲ-4/10» ծածկագրով շրջանակային համաձայնագրերի միջոցով գնում կատարելու ընթացակարգի (այսուհետ նաև՝ Ընթացակարգ) հայտերի բացման նիստից հետո սահմանված կարգով՝ հրավերի պահանջներին բավարար գնահատված և նվազագույն գնային առաջարկ ներկայացրած մասնակիցները Armeps համակարգի միջոցով ոչ ավտոմատ եղանակով ծանուցվել են երեք աշխատանքային օրվա ընթացքում որակավորման չափանիշները հիմնավորող փաստաթղթերը ներկայացնելու վերաբերյալ:

1-ին տեղ զբաղեցրած մասնակիցներից՝ «Նոյավան» ՍՊԸ-ն պահանջվող փաստաթղթերը չի ներկայացրել:

Հաշվի առնելով վերոգրյալը՝ Ընթացակարգի գնահատող հանձնաժողովի կողմից Ընկերության հայտը մերժվել է:

Պատվիրատուն, պատշաճ ծանուցված լինելով Խորհրդի 23.06.2017թ. ժամը 10:45-ի նիստի վերաբերյալ, չի ապահովել իր ներկայացուցչի մասնակցությունը:

4. ՍՑ-ԱՄ-2017/23 պաշտոնական ընթացակարգի քննության համար էական նշանակություն ունեցող փաստերը

ՍՑ-ԱՄ-2017/23 պաշտոնական ընթացակարգի քննության համար էական նշանակություն ունեն հետևյալ փաստերը՝

1. ՀՀ պաշտպանության նախարարության կողմից ՀՀ պաշտպանության նախարարության կարիքների համար կազմակերպված «ԳԱԿ-ՇՀԱՊՁԲ-15/7-ՀՀ ՊՆ ՆՏԱԴ-ՇՀԱՊՁԲ-4/10» ծածկագրով շրջանակային համաձայնագրերի միջոցով գնում կատարելու ընթացակարգին մասնակցելու նպատակով «Նոյավան» ՍՊԸ-ն հայտ է ներկայացրել:

2. Ընթացակարգի գնահատող հանձնաժողովի 20.04.2017թ. ժամը 10:00-ի նիստի թիվ 3 արձանագրությամբ կայացված որոշմամբ «Նոյավան» ՍՊԸ-ն ճանաչվել է 1-ին տեղ զբաղեցրած մասնակից՝ Ընթացակարգի 7-րդ, 15-րդ, 25-րդ, 27-րդ չափաբաժինների մասով:

3. Ընթացակարգի գնահատող հանձնաժողովի քարտուղարը ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 47-րդ կետի 2-րդ կետով սահմանված կարգով Armeps համակարգի միջոցով ոչ ավտոմատ ծանուցման եղանակով 20.05.2017թ. ծանուցել է «Նոյավան» ՍՊԸ-ին՝ առաջարկելով համապատասխան ծանուցումը ստանալուց հետո հրավերով սահմանված ժամկետում և կարգով a.amiryan@mil.am էլեկտրոնային փոստին ներկայացնել հրավերի 2-րդ մասի՝ հայտը պատրաստելու հրահանգի 3-րդ կետով նախատեսված փաստաթղթերը (հրավերով նախատեսված որակավորման չափանիշները հիմնավորող փաստաթղթերը):

4. Ընթացակարգի գնահատող հանձնաժողովի 30.05.2017թ. ժամը 11:00-ի նիստի թիվ 4 արձանագրության 1.1 կետով կայացված որոշմամբ «Նոյավան» ՍՊԸ-ի հայտը մերժվել է՝ այն հիմնավորմամբ, որ Ընկերության կողմից սահմանված ժամկետում չեն ներկայացվել որակավորման չափանիշները հիմնավորող հրավերով նախատեսված փաստաթղթերը:

5. ՀՀ գնումների բողոքարկման խորհրդին ուղղված 23.06.2017թ. գրությամբ «Նոյավան» ՍՊԸ-ն հայտնել է, որ «ԳԱԿ-ՇՀԱՊՁԲ-15/7-ՀՀ ՊՆ ՆՏԱԴ-ՇՀԱՊՁԲ-4/10» ծածկագրով ընթացակարգի շրջանակներում որակավորման չափանիշները հիմնավորող փաստաթղթերը ներկայացնելու վերաբերյալ Ընթացակարգի գնահատող հանձնաժողովի քարտուղարի կողմից ուղարկված ծանուցումը հայտնվել է Ընկերության «noyavanllc@mail.ru» էլեկտրոնային փոստի «սպամ» նամակների մեջ, որի հետևանքով Ընկերությունը չի նկատել ծանուցումը, ուստի համապատասխան փաստաթղթերը չեն ներկայացվել:

5. Խորհրդի հիմնավորումները և եզրահանգումը

Խորհուրդն, ուսումնասիրելով ՀՀ ֆինանսների նախարարության 16.06.2017թ. թիվ 03/27-1/10923-17 գրությունը, ՀՀ պաշտպանության նախարարության 06.06.2017թ. թիվ ԴՎԱ/1689 գրությունը և կից փաստաթղթերը, հայտնում է հետևյալը.

«Գնումների մասին» ՀՀ օրենքի (այսուհետ նաև՝ Օրենք) 5-րդ հոդվածի 1-ին մասի 4-րդ կետի «ա» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, **եթե հայտը ներկայացնելու պահին նախորդող տարվա ընթացքում ավելի քան մեկ անգամ խախտել է պայմանագրով նախատեսված կամ գնման գործընթացի շրջանակում ստանձնած պարտավորություն, որը հանգեցրել է պատվիրատուի կողմից պայմանագրի միակողմանի լուծարմանը կամ գնման գործընթացին տվյալ մասնակցի հետագա մասնակցության դադարեցմանը:**

Օրենքի 25-րդ հոդվածի 2-րդ կետի 1-ին ենթակետի համաձայն՝ հրավերում նախատեսվում է նաև, որ մասնակիցը գնումներին մասնակցելու իր իրավունքը և հրավերով նախատեսված որակավորման չափանիշներին համապատասխանությունը հիմնավորելու համար հայտով ներկայացնում է իր կողմից հաստատված հայտարարություն, պայմանով, որ մասնակիցը պարտավորվում է սույն օրենքով նախատեսված դեպքերում և կարգով ներկայացնել հայտարարությունը հիմնավորող՝ հրավերով նախատեսված փաստաթղթերը (տեղեկությունները):

Օրենքի 31-րդ հոդվածի 5-րդ մասի 1-ին կետի համաձայն՝ առաջին և հաջորդաբար տեղերը զբաղեցրած մասնակիցներին որոշելուց հետո՝ հրավերով սահմանված ժամկետում առաջին տեղը զբաղեցրած մասնակիցը հանձնաժողովին է ներկայացնում իր՝ գնումներին մասնակցելու իրավունքը և հրավերով նախատեսված որակավորման չափանիշներին համապատասխանությունը հիմնավորող՝ հրավերով նախատեսված փաստաթղթերը (տեղեկությունները):

Կարգի 47-րդ կետի 2-րդ ենթակետը սահմանում է, որ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային եղանակով ծանուցում է առաջին տեղը զբաղեցրած մասնակցին՝ առաջարկելով երեք

աշխատանքային օրվա ընթացքում ներկայացնել որակավորման չափանիշները հիմնավորող՝ հրավերով նախատեսված փաստաթղթերը, իսկ ապրանքների գնման դեպքում նաև նույն կարգի 35-րդ կետի 1-ին ենթակետի «գ» պարբերությամբ նախատեսված փաստաթուղթը: Նույն մասով սահմանված ժամկետում փաստաթղթերը չներկայացվելու դեպքում հանձնաժողովը մերժում է առաջին տեղը զբաղեցրած մասնակցի հայտը և փաստաթղթեր ներկայացնելու պահանջ է ներկայացնում հաջորդող տեղը զբաղեցրած մասնակցին:

Ընթացակարգի հրավերի ՄԱՍ 1-ի 7-րդ կետի 7.5-րդ ենթակետի համաձայն՝ գնահատող հանձնաժողովի քարտուղարը հայտերի բացման նիստի ավարտին հաջորդող աշխատանքային օրը՝

1) ոչ ավտոմատ եղանակով ծանուցում է հրավերի պահանջներին բավարար գնահատված և նվազագույն գնային առաջարկ ներկայացրած Մասնակցին՝ առաջարկելով 3 աշխատանքային օրվա ընթացքում ներկայացնել որակավորման չափանիշները հիմնավորող սույն հրավերի 2-րդ մասի՝ հայտը պատրաստելու հրահանգի 3-րդ բաժնով նախատեսված փաստաթղթերը, ինչպես նաև հայտով առաջարկված ապրանքի (ապրանքների) անվանումը և տեխնիկական բնութագրերը: Առաջին տեղը զբաղեցրած Մասնակիցը երեք աշխատանքային օրվա ընթացքում Պատվիրատուի պաշտոնական էլեկտրոնային փոստին՝ a.amiryan@mil.am, է ուղարկում սույն ենթակետով նախատեսված փաստաթղթերը:

Սույն ենթակետով սահմանված ժամկետում փաստաթղթերը չներկայացվելու դեպքում հանձնաժողովը մերժում է առաջին տեղը զբաղեցրած Մասնակցի հայտը և փաստաթղթեր ներկայացնելու պահանջ է ներկայացնում հաջորդող տեղը զբաղեցրած Մասնակցին:

ՀՀ պաշտպանության նախարարության կարիքների համար կազմակերպված «ԳԱԿ-ՇՀԱՊՁԲ-15/7-ՀՀ ՊՆ ՆՏԱԴ-ՇՀԱՊՁԲ-4/10» ծածկագրով շրջանակային համաձայնագրերի միջոցով գնում կատարելու ընթացակարգին մասնակցելու նպատակով հայտ ներկայացրած «Նոյավան» ՍՊԸ-ն Ընթացակարգի գնահատող հանձնաժողովի 20.04.2017թ. ժամը 10:00-ի նիստի թիվ 3 արձանագրությամբ կայացված որոշմամբ

ճանաչվել է 1-ին տեղ զբաղեցրած մասնակից Ընթացակարգի 7-րդ, 15-րդ, 25-րդ, 27-րդ չափաբաժինների մասով:

Ընթացակարգի գնահատող հանձնաժողովի քարտուղարը ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի 47-րդ կետի 2-րդ կետով սահմանված կարգով Armeps համակարգի միջոցով ոչ ավտոմատ ծանուցման եղանակով 20.05.2017թ. ծանուցել է «Նոյավան» ՍՊԸ-ին՝ առաջարկելով համապատասխան ծանուցումը ստանալուց հետո հրավերով սահմանված ժամկետում և կարգով a.amiryan@mil.am էլեկտրոնային փոստին ներկայացնել հրավերով նախատեսված որակավորման չափանիշները հիմնավորող փաստաթղթերը, որոնք սակայն Ընկերության կողմից սահմանված ժամկետում չեն ներկայացվել:

Ընթացակարգի գնահատող հանձնաժողովի 30.05.2017թ. ժամը 11:00-ի նիստի թիվ 4 արձանագրության 1.1 կետով կայացված որոշմամբ «Նոյավան» ՍՊԸ-ի հայտը մերժվել է:

«Գնումների մասին» ՀՀ օրենքի 5-րդ հոդվածի 1-ին մասի 4-րդ կետի «ա» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե հայտը ներկայացնելու պահին նախորդող տարվա ընթացքում ավելի քան մեկ անգամ խախտել է գնման գործընթացի շրջանակում ստանձնած պարտավորություն, որը հանգեցրել է գնման գործընթացին տվյալ մասնակցի հետագա մասնակցության դադարեցմանը:

Այսպիսով՝ Խորհուրդն արձանագրում է, որ «Նոյավան» ՍՊԸ-ն «ԳԱԿ-ՇՀԱՊԶԲ-15/7-ՀՀ ՊՆ ՆՏԱԴ-ՇՀԱՊԶԲ-4/10» ծածկագրով գնման գործընթացի շրջանակում թույլ է տվել ստանձնած պարտավորության խախտում, քանի որ Ընթացակարգի գնահատող հանձնաժողովի քարտուղարի կողմից սահմանված կարգով Armeps համակարգի միջոցով ոչ ավտոմատ եղանակով ուղարկվել է Կարգի 47-րդ կետի 2-րդ ենթակետով նախատեսված՝ որակավորման չափանիշները հիմնավորող փաստաթղթերը սահմանված ժամկետում ներկայացնելու անհրաժեշտության վերաբերյալ ծանուցումը, որը ստացվել է «Նոյավան» ՍՊԸ-ի կողմից, սակայն Ընկերության կողմից սահմանված կարգով գնահատող հանձնաժողովին չեն ներկայացվել համապատասխան փաստաթղթերը:

Ինչ վերաբերում է Ընկերության այն պնդմանը, որ համապատասխան ծանուցումը հայտնվել է «Նոյավան» ՍՊԸ-ի էլեկտրոնային փոստի «սպամ» նամակների մեջ, ապա, Խորհուրդն արձանագրում է, որ Կարգի 47-րդ կետի 2-րդ ենթակետով նախատեսված ծանուցումը սահմանված կարգով ուղարկվել է գնահատող հանձնաժողովի քարտուղարի կողմից, որը փաստացի ստացվել է «Նոյավան» ՍՊԸ-ի «noyavanllc@mail.ru» էլեկտրոնային փոստին՝ անկախ այն հանգամանքից, որ ծանուցումը հայտնվել է «սպամ» նամակների մեջ:

Այսփոսով, հաշվի առնելով վերոգրյալը, Խորհուրդը գտնում է, որ «Նոյավան» ՍՊԸ-ի կողմից խախտվել է Օրենքի 5-րդ հոդվածի 1-ին մասի 4-րդ կետի «ա» ենթակետով նախատեսված գնման գործընթացի շրջանակում ստանձնած պարտավորություն: Միևնույն ժամանակ հաշվի առնելով այն հանգամանքը, որ Ընկերության կողմից խախտվել է գնման գործընթացի շրջանակում ստանձնած մեկ պարտավորություն, Խորհուրդը գտնում է, որ «Նոյավան» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 6-րդ մասի 7-րդ կետով՝ ՀՀ գնումների բողոքարկման խորհուրդը

Ո Ր Ո Շ Ե Ց

Հայաստանի Հանրապետության ֆինանսների նախարարության 16.06.2017թ. թիվ 03/27-1/10923-17 գրությամբ «Նոյավան» ՍՊԸ-ին (ՀՎՀՀ՝ 04100518) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

**ՀՀ գնումների բողոքարկման
խորհրդի անդամ՝**



ՄՀԵՐ ԱՆԱՆՅԱՆ